



08. august 2023

UKA 2023/134

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Selskabslovip allanngortinneratigut takornarialerinikkut, aalisarnikkut, sanaartornikkut, ussassaarutilerinikkullu suliffeqarfiit nunatta avataaniit pigineqartut immikkut allattorsimaffikkut nalunaarsorneqarsinnaalernissaannut periarfissat pillugit Naalakkersuisut nalunaarusioqqullugit Inatsisartut aalajangiiffigisassaattut siunnersuut. Nalunaarusiaq UKA2024 nallertinnagu Inatsisartunut agguanneqassaaq.

(Inatsisartuni ilaasortaq Aqqalu C. Jerimiassen, Atassut)

Ukiut tamarluinnaasa tusakulunnartaqaaq, nunatsinniinngooq aningaasat aniaannarput, naak immaqa ilarpassui silaannarmiit tiguinnangaangaluarlutik oqarluartaartuuniillu uppertitsiniutaanerusutut isikkoqaraluartut, taamaattoq peqarpoq suliffeqarfinnik annertuumik iluanaaruteqartartunik takussutissaqartunik nunatta avataanit pigineqartunit.

Uagutsinnut pingaarnerpaaq tassaavoq, aningaasaq nunatsinniiginnartinneqartariaqartoq annertunerpaamik.

Takornariaqartitsiviillu aalisarnikkut sanaartornikkut kiisalu ussassaarutilerinikkut suliffeqarfiit nunatta avataaniit piginnittoqartut, akileraareerlutik sinneqartoorutitik suliffeqarfimmuut ”anaanaasumut” ilarpassui tunniuttaraat tusartuarparput. Tamakkulu tusartakkat uppennarsilluarsinnaalissavagut suliffeqarfiit immikkut nalunaarsorneqartalerpata.

Tassuunakkullu Inuussutissarsiummik ingerlataqartut nalunaarsorsimaffianni nunatsinnut atuuttussamik nutaamik inissiinissaq eqqarsaasersuutaasariaqalerpoq, A/S-iuppat ApS-iuppalluunniit, ilusaa assersuutitut atoraanni ingerlataqartup nalunaarsoqqanera ”nunatta avataanit pigineqartoq A/S” atuutsilersinnaalugu.

Taamaliornikkut aningaasat amerlanerusut nunatsinni uninngatiinnarneqarsinnaanissaat ugartorsinnaavarput, assersuutigalugu akitsuuseriaaseq ataasiartumik ikkuttartoq nunatta avataanit pigineqartunut suliffeqarfinnut ikkussinnaallugu, akileraareernermi sinneqartoorutinit ilanngarneqartartussaq.

Uanili siunertaassanngilaq, avataaniit suliffeqarfiit ingeraleqartut tatamisittooratarsinnaaneri. Taamaattorli MOMS-itulluunniit ikannersinnaasumik suliffeqarfiit aaliangersimasut avataaniit pigineqartut ikkussivigineqarsinnaanissaat siunertaammat.

Oqartuarpugummi, takornariaqarneq nunatta iluanaarutigisariaqarpaa, avataaniillu annertuallaaminngooq sunnersimaneqartoq, taamaassimappat iliuuseqartussat tassaapput uagut



inatsisartut, inatsisartuni uagut tamanna nikisinnikkutsigu ullumikkut inissisimanerput nikikkunnangilaq.

Takusinnaavarputtaaq nunatsinni tusagassiutileriffiit, aviisiniit nutaarsiassaqaqtitsivinnut, lokalaviisit lokalradiollu aningaasaqarniarnerat artorsartoq, avataaniit suliffeqarfissuit piseqqusaarutinik ussasaarutinillu ingerlataqartut kisermaassiaartuaalerlutik inissikkiartuaalernerat.¹

Taamaattumik tamassi suleqatiseraassi, nassaassarsioqatigerusullusi, qanoq iliorluta aningaasaq nunatsinni annertunerpaaffissaanik uninngatiinnarsinnaanissaanut.

Aningaasatigut ingerlatsinikkullu pisortanut kingunerisassai:

Pilersaarusiasmut piffissaq atorneqartussaq ukiup ilivitsup iluaniissinnaanissaa naatsorsuutigineqassaaq. AC-fuldmægtigellu ukiup affaanut sulineratut naleqassalluni 500.000kr.

Namminersortunut aningaasarsiornikkut allaffissornikkullu kingunerisassai:

Soqanngilaq.

Innuttaasunut aningaasarsiornikkut allaffissornikkullu kingunerisassai:

Soqanngilaq.

¹ <https://sermitsiaq.ag/kl/aaqqissuisuunerup-ag-liaa-kingulleqtusagassiutit-illit-sinnerlutit-alaatsinaapput>